

# ABSTRAK

Laporan ini disediakan bagi memaklumkan hasil Kajian Pelaksanaan Projek Penarafan Tunggal Program TVET (PTPT) dalam menyokong pelaksanaan Dasar TVET Negara (DTN) 2030. Hasil kajian dijangka membantu memperkukuh kualiti dan daya saing sistem TVET negara melalui pelaksanaan PTPT yang lebih berkesan dan selaras dengan matlamat DTN 2030.

Kajian ini meliputi analisis mendalam terhadap keberkesanan mekanisme PTPT. PTPT diperkenalkan selaras dengan hasrat untuk memperkukuh ekosistem TVET di Malaysia, sejajar dengan aspirasi menyeluruh yang digariskan dalam Rancangan Malaysia Ke-Dua Belas (RMKe-12). Mekanisme ini dibangunkan bagi menangani isu berlarutan seperti ketidakeragaman dalam amalan pentauliahan, ketiadaan kerangka penilaian yang standard, serta kesukaran membuat perbandingan antara program Pendidikan dan Latihan Teknikal dan Vokasional (*Technical and Vocational Education and Training – TVET*) merentasi institusi di Malaysia.

Kajian ini mengetengahkan analisis mendalam terhadap PTPT dan implikasinya terhadap kualiti penarafan di peringkat program. Kajian ini dilaksanakan berdasarkan kepada penilaian asas di peringkat nasional yang komprehensif, merangkumi tinjauan soal selidik sesi perbincangan fokus, dan temu bual yang melibatkan pemegang taruh dalam ekosistem TVET. Kajian ini turut disokong dengan analisis berdasarkan penandaarasan antarabangsa melibatkan sembilan buah negara yang terpilih bagi mengenal pasti amalan terbaik global dalam sistem penilaian TVET.

Dapatan kajian menunjukkan pihak berkepentingan memberikan sokongan terhadap model PTPT sedia ada, di samping terdapat ruang penambahbaikan yang jelas. Antara cadangan teras yang dikemukakan termasuk pelaksanaan model berasaskan pentauliahan di peringkat program dan pelaksanaan model penarafan di peringkat institusi, serta memasukkan panduan kualitatif dalam pelaksanaan kedua-duanya. Pengawal selia juga dicadang mengekalkan model tadbir urus berpusat (*centralised governance model*) dengan potensi desentralisasi terpilih (*selective decentralisation*) dimulai dengan sektor dengan industri yang lebih matang dan telah berkembang bagi pentauliahan di peringkat program.

Kajian ini turut memberi saranan dan syor strategik untuk menambah baik kerangka jaminan kualiti (*quality assurance framework*) serta penilaian prestasi dan kualiti TVET di Malaysia, demi meningkatkan keyakinan pemegang taruh, prestasi institusi dan penajajaran matlamat pembangunan modal insan masa hadapan.